

權德輿

竹居攷虞

全唐文

卷之三

竹居文集

全唐文

欽定全唐文卷五百八目錄

權德輿 二十六

吳尊師傳

唐德宗皇帝諡冊文


唐順宗莊憲皇后諡冊文

告王考禮部府君文

告王妣楊氏文

告先公貞孝公文

祭屯田柳郎中文



祭海陵李少府元易文

祭戶部員外叔父文

祭李處士穰子文

祭外舅相國安平公文

祭李祭酒文

祭薛殿中文

祭祕書包監文

祭呂給事文

祭梁補闕文

祭韓祭酒文

欽定全唐文

卷五百八

欽定全唐文卷五百八

權德輿 一十六

吳尊師傳

吳筠字貞節魯中儒士也少通經善屬文舉進士不第性高潔不伍流俗乃入嵩山依體元先生潘師正爲道士傳正一之法苦心鑽仰盡通其術開元中南遊金陵訪道茅山久之東遊天台筠尤善著述在剡與越中文士爲詩酒之會所著歌篇傳於京師元宗聞其名遣使徵之旣至與語甚悅令待詔翰林帝問以道法對曰道法之精無如五

千言其諸枝詞蔓說徒費紙剗爾又問神仙修鍊之事對
曰此野人之事當以歲月功行求之非人主所當適意每
與緇黃列坐朝臣啟奏筠之所陳但名教世務而已閒之
以諷詠以達其誠元宗深重之天寶中李林甫楊國忠用
事綱紀日紊筠知天下將亂堅求還嵩山累表不許乃詔
於嶽觀別立道院祿山將亂求還茅山許之旣而中原大
亂江淮多盜乃東遊會稽常於天台剡中往來與詩人李
白孔巢父詩篇酬和逍遙泉石人多從之竟終越中文集
二十卷其元綱三篇神仙可學論尤爲達識之士所稱凡

爲文詞理疏通文彩煥發每製一篇人皆傳寫雖李白之
放蕩杜甫之壯麗能兼之者其惟筠乎

唐德宗皇帝諡冊文

維永貞元年歲次乙酉十月景申朔孝孫嗣皇帝臣某伏
維大行皇帝德合天地作人父母纂承光明建用皇極昔
在寶應制天下賦輿戚藩以大自魯疏雍師律旣貞會陝
收洛克燁威命廓開王塗自登上嗣乃宅丕后服藝祖神
宗之大烈有乾乾翼翼之至敬敷佑迪哲尊嚴懿恭燭明
四極發育萬物濯沐乎仁澤澄清乎理本巍巍乎建中風

聲與貞觀同符洎時有侵沴變生京轂省方履薄宏陰隲之功整旅致誅申震耀之令氛祲滅息侯王軌道丕冒持載鏡清砥平然後明禋祀萬靈以接翕受敷施九德咸事含宏亭毒以致其和博采虛受以通其志政刑有箴宸宸有銘煥乎文明之化成也因時創節象卦設樂薰然中和之被物也納嘉言於近侍輟已行之詔疾讒口於宵人有過誤之罪去徽號而約已正廟祧而尊祖九譯通道萬方來庭賓旅焯乎勲籍夷歌陳於樂府霜露所隊車書大同順氣旁達天休滋至慶霄輪囷德水清澈三辰陽以

宣耀百嘉麗地而交感飛走呈祥肖翹遂性在宥天下二
十有七年夫文思光被陶唐之盛也懔懔忠利虞帝之教
也亶亶穆穆周文之業也聰明神武漢祖之烈也窮古先
之大律極帝者之上儀方將扈升介丘侍檢玉牒奄遺天
命永棄萬方億兆嗷嗷哀號靡訴顧惟沖昧懼忝孫謀君
父有命付茲神器虔恭貽訓感慕滋深今因山旣建同軌
畢至一二元老宗工碩生考稱天之禮稽節惠之法式遵
古義敢薦大名謹遣攝太尉門下侍郎平章事杜黃裳謹
奉冊上尊諡曰神武孝文皇帝廟曰德宗伏惟聖靈昭格

膺是典禮幽贊丕祉流於無窮嗚呼哀哉

唐順宗莊憲皇后諡冊文

維元和十一年歲次景申某月朔日哀子嗣皇帝臣某伏
維大行皇太后柔明承天廣大法地齊二儀以發育含萬
物而化光靜專宅心謙儉約已塗山積厚淮水秉靈四德
交修六宮承式於德宗有逮事之孝敬於先皇有輔佐之
憂勤啟迪風徽儀刑天下伏以永貞詰命脫躡寰區乃居
太上之尊乃正中宮之位顧茲冲眇上荷劬勞自幼逮長
稟邑姜之教勗繼體纂圖申長信之供養率用慈訓施於

理道母儀所被子惠所覃一紀於茲萬方蒙福以載物之
量包逮下之仁嗣任姒之徽音慕黃老之清淨宜錫丕祉
壽如岡陵昊蒼不憖艱棘俄及追惟顧復創鉅感深銜恤
茹荼叩心罔極今祔虞卽遠龜筮告吉順厚夷體幽嚴就
路宰政卿尹與典禮之官詢考古式詳稽諡法以周道章
明未之或改形容擬議敢易大名謹遣攝太尉中書侍郎
平章事臣裴度奉冊上尊諡曰莊憲皇后伏惟皇靈降格
淑聖幽贊昭配清廟對越鴻休與太陰方祇永永無窮鳴
呼哀哉

告王考禮部府君文

維元和十二年歲次丁酉七月戊子朔十五日壬寅孤孫
山南西道節度管內支度營田觀察處置等使銀青光祿
大夫檢校吏部尚書興元尹御史大夫扶風郡開國公食
邑二千戶某敢昭告於王考贈尚書禮部郎中府君伏惟
尊行令德不丁於時義方教忠貽厥延耀今王妣靈輅至
白澤國龜筮叶吉啟祔有期聖慈孝理贈典褒賁敢用遠
日祇焚命書綏服徽數加大夫之飾官守拘限不獲躬親
謹遣男監察御史裏行璩以柔毛剛鬣嘉薦醴齊將命襄

事伏惟尊靈降格

告王妣楊氏文

維云云敢昭告於王妣夫人宏農楊氏伏惟坤順協德閨
門流慶昔歲違難假葬南方今龜策告猷歸祔伊洛先遠
將及恩禮特加王考府君有褒錫之命限以守在方任兼
領戎師不獲榮護道途躬奉窀穸殘生孤苦萬感在心謹
遣男璩以柔毛剛鬣嘉薦醴齊展禮伏惟尊靈降格

告先公貞孝公文

維云云敢昭告於考贈太子太保貞孝公妣贈絳郡太夫

人隴西李氏追惟齟歲奄失嚴訓迨至立年再鍾荼蓼零
丁孤藐苟未滅身自幼逢聖明獲備將相祇循教義摧割
肝心伏以潤州壤樹久已安宅但地遠江介心焉匪寧遷
神反祔永懷怵惕伊水之陽喬木斯在伏以二尊棄代年
紀寢遠四承追命再受封疆禮官易名考功奏議今因祖
載備舉徽章王考府君恩加贈典申下養之義遂罔極之
誠孤蒙無似觸緒崩裂受命守土有闕躬親謹遣男璩以
柔毛剛鬣嘉薦醴齊將事祇薦伏惟尊靈降鑒永寧厚載

祭屯田柳郎中文

維建中二年歲次辛酉某月朔日試右金吾衛兵曹參軍
權德輿謹以清酌時羞之奠敬祭於故屯田郎中柳公之
靈在漢理平子陵退耕運鍾明時公遂性情典校司諫便
蕃清秩南宮之拜詔書三出中朝虛左公志不屈優游化
源消息心術四時芬芳百鍊精剛德充於中用晦彌光是
非萬殊不滑其常和易內蘊發於文章性命之際希夷之
域理無不窮言必冥極救彼文勝作爲典式扶教立言實
在清德時方逐進公則尚退人或外獎公則理內獨立不
惑以身矯世萬頃淵然孰知其際顧惟小子猥奉音徽賞